

der roth vnd geel Weiderich: Als ist Telephium ein art Wundenkraut/
welches Krafft Telephus ein König Misia an tag bracht hat: Als ist
Artemisia Benfuß/welcher erfundung der Artemisia des Königes Mau-
soli in Caria Gemahl/ zugeengnet wird/ vnd solcher Exempel vnzehlich
viel mehr / könte ich / mein Vornehmen damit zubestetigen vnd zubes-
weisen/ erzehlen: Aber ich achte es dismals für vnnötig.

Was ist nun hieraus zumercken/ zwar hieraus kan menniglich ab-
nehmen vnd schliessen/ wie das zu allen Zeiten der Welt / mit höchstem
Fleiß vnd Ernst die Kräfte der Elementarischen geschaffnen Körper / zu
fürderung der löblichen Kunst der Arzeneien/ erforscht vnd erfunden wor-
den seyn/ in dem aber solches geschehen ist / seyn gar wenig erfunden wor-
den/ die darnach mit fleiß strebten vnd trachteten/ wie die erforschte vnd
erfundene Arzeneien / möchte recht vnd wol præparirt vnd zugericht wer-
den / das sie ihre Kräfte an tag bringen/ vnd als kräftige/ warhafftige/
nutzbare Arzeneien möchten in der That erfunden werden.

Ich weiß zwar nit/ ob man ein schlecht Gewächs/ Erß oder Thier/
ohn ein gebührliche præparation vnd zubereitung ein Arzeneien nennen
soll. Wer will sagen/ das ein grober vnbewahrter Stein / oder ein vnges-
formiertes vngestalttes Holz / ein Statua oder Bildtnuß sey/ wo es nicht
zuvor ein Gestalt eines Menschen/ eines Pferds/ eines Hundes oder ders-
gleichen empfangen hat/ also kan auch schwerlich ein rohes/ unreines / vn-
saubers/ vnzubereites Gewächs/ Erß oder Thier/ ein Arzeneien genenne
werden/ also gehets auch seltsam mit seiner operation vnd Wirkung zu.
Was soll man viel dauon schreiben? Die Erfahrungheit in curationibus
Medicis rufft vberlaut/ vnd klaget sehr hefftig zu diesen letzten Zeiten/ vnd
in diesem hohen Alter der Welt/ vber die Historiam Medicam, das ist/
vber die Bücher der Alten/ das die qualitates vnd Kräfte der Kräuter/
Erß vnd Thierer/ nicht in der That sich also befinden/ als sie dauon weit-
leufftig nach der Länge geschrieben haben / was soll man sagen / haben sie
dann vnwahre Ding auff's Papier bracht? Das läßt sich die Experien-
tia nicht hören/ sonder sie begert zur Hülfferin die gebührliche præpara-
tionem vnd zubereitung / das die gebundne qualiteten der Arzeneien
mögen loß werden/ vnd die Vires vnd Kräfte/ dauon die Alten geschries-